

Na osnovu odredbi člana 14. Zakona o udruženjima i fondacijama ("Službene novine Federacije BiH" broj: 45/02), i članovima 7, 11 i 20 Statuta Bošnjačke zajednice kulture (skraćeno BZK) "Preporod" u Bosni i Hercegovini, Skupština Općinskog društva BZK "Preporod" Srebrenik, na sjednici održanoj dana 21.11. 2018 .godine, donosi :

STATUT

OPĆINSKOG DRUŠTVA BZK "PREPOROD" SREBRENİK

I OSNOVNE ODREDBE

Član 1.

Ovim Statutom utvrđuje se :

- Status općinskog društva BZK "Preporod" Srebrenik
- Pečat, štambilj i znak
- Naziv, sjedište, zastupanje i predstavljanje
- Programski ciljevi i djelatnost
- Prava i odgovornosti članova BZK "Preporod" Srebrenik
- Organi općinskog društva
- Unutrašnja organizacija
- Sticanje i raspolaganje imovinom
- Način donošenja finansijskog izvještaja i izvještaja o radu
- Javnost rada
- Povezivanje sa drugim organizacijama, društvima i ustanovama u BiH
- Finansiranje
- Način donošenja Statuta i izmjene i dopune Statuta,
- Uslovi za prestanak i postojanje rada

II. STATUS

Član 2.

Općinsko društvo BZK "Preporod" Srebrenik je članica Bošnjačke zajednice kulture Preporod u BiH (u daljem tekstu BZK "Preporod" u BiH) na osnovu Odluke Skupštine općinskog društva BZK "Preporod" Srebrenik, a radi postizanja ciljeva sadržanih u Statutu BZK "Preporod" u BiH (VI-ciljevi)

Član 3.

Općinsko društvo BZK "Preporod" Srebrenik (u daljem tekstu "Društvo") je dobrovoljno nestranačko društvo osnovano radi postizanja ciljeva sadržanih u Ustavu BZK "Preporod " u BiH i Statutu BZK "Preporod "u BiH i svom Statutu.

Član 4.

Općinsko društvo BZK "Preporod" Srebrenik djeluje u skladu s Ustavom i Statutom Bošnjačke zajednice kulture "Preporod" u BiH i zakonima države i Federacije Bosne i Hercegovine.

Općinsko društvo BZK "Preporod" Srebrenik i Bošnjačka zajednica kulture "Preporod" u Bosni i Hercegovini, djeluju na teritoriji Federacije BiH i države Bosne i Hercegovine.

Član 5.

Općinsko društvo BZK "Preporod" Srebrenik je udruženje građana koje je osnovano i djeluje u skladu sa Zakonom o udruženjima građana i gaji tradicije kulturnih društava Bošnjaka "Preporod" u BiH.

III. NAZIV, SJEDIŠTE, ZASTUPANJE I PREDSTAVLJANJE

Član 6.

Puni naziv Društva je : Bošnjačka zajednica kulture "Preporod" u Bosni i Hercegovini, općinsko društvo BZK "Preporod" Srebrenik.

Skraćeni naziv Društva je : Općinsko društvo BZK "Preporod" Srebrenik.

Član 7.

Sjedište Općinskog društva BZK "Preporod" Srebrenik je u Srebreniku.

Član 8.

Općinsko društvo BZK "Preporod" Srebrenik ima svoj pečat. Pečat je okruglog oblika, promjera 35 mm koji sadrži naziv i sjedište općinskog društva, sa znakom Bošnjačke zajednice kulture "Preporod" u sredini. Znak je slovno-figuralni lik pauna, čijom je sredinom ispisan tekst "Preporod".

Član 9.

Općinsko društvo BZK "Preporod" Srebrenik može imati i prijemni štambilj koji služi za evidentiranje prijemne pošte. Prijemni štambilj je četvrtastog oblika i mora sadržavati skraćeni naziv društva, prostor za upisivanje broja i datuma prijema pošte i drugih oznaka.

Član 10.

Općinsko društvo BZK "Preporod" Srebrenik zastupa i predstavlja predsjednik Općinskog društva BZK "Preporod" Srebrenik.

U slučaju odsutnosti, ili bolesti predsjednika, zastupanje i predstavljanje društva vrši zamjenik predsjednika, odnosno lice koje predsjednik odredi.

Član 11.

Predsjednik Općinskog društva BZK "Preporod" Srebrenik može posebnom punomoći ovlastiti lice odgovarajućih stručnih sposobnosti da zastupa društvo pred sudovima, javnim institucijama, organima uprave i dr. uz preciziranje sadržaja punomoći.

IV. PROGRAMSKI CILJEVI

Član 12.

Programski ciljevi Općinskog društva BZK "Preporod" Srebrenik identični su ciljevima BZK "Preporod" u BiH, a naročito:

1. Razvijanje i snaženje svijesti o ukupnosti bošnjačke kulture u svjetskoj zajednici kultura;
2. Istraživanje i predstavljanje svih sadržaja bošnjačke kulture u okviru nastojanja Bošnjaka da sebi osiguraju ravnopravan položaj u svjetskoj zajednici naroda;
3. Uspostavljanje i razvijanje društava, organizacija i ustanova potrebnih za djelotvornu bošnjačku kulturnu cjelovitost;
4. Razvijanje i jačanje patriotske svijesti i znanja o narodnoj cjelovitosti, posredstvom snaženja osjećanja odgovornosti svakog pojedinca prema nacionalnoj cjelovitosti, te odgovornosti nacionalnih organizacija, društava i ustanova prema svakome pojedincu;
5. Izgradnja uvjeta nacionalne organiziranosti u kojima će Bošnjaci preuzeti odgovornost za sve svoje ciljeve, gdje god je to moguće, uz uvažavanje svih prava drugih u pravednom međunarodnom poretku;
6. Povezivanje svih bošnjačkih organizacija, društava i ustanova u svjetsku zajednicu koja će

- biti sposobna da istražuje i razrješava najvažnije zadaće bošnjačke kulture;
7. Uspostavljanje prijateljskih veza sa svim organizacijama, društvima i ustanovama drugih naroda u zemlji i svijetu, u cilju saradnje i međusobnog pomaganja;
 8. Razvijanje svijesti i organizacijskih oblika, koji će doprinositi da najugroženiji dio bošnjačkog naroda budeštićen u okviru organizirane cjeline bošnjačkog naroda;
 9. Upoznavanje i sprečavanje djelovanja svih oblika protiv bošnjačkih elita, ideologija i organizacija;
 10. Osiguranje neovisnosti u svim područjima kulturnog života gdje je to moguće i ravnopravne suradnje sa svim narodima u zemlji i svijetu, na temelju međusobnog poštivanja i promicanja pravednog i mirnog dijaloga;
 11. Preuzimanje i razvoj pozitivnih iskustava svih drugih naroda, organizacija, društava i ustanova, kako bi ona postajala sastavni dio bošnjačke kulture;
 12. Predstavljanje i tumačenje svih postignuća bošnjačke kulture koji čine dio opšte kulturne riznice svijeta.

V. DJELATNOST

Član 13.

1. Istraživanje i izučavanje historijskog, kulturnog, književnog, umjetničkog i društvenog razvoja Bošnjaka od najstarijih vremena do danas, te objavljivanje i prikazivanje rezultata ovog djelovanja, a radi afirmacije i popularizacije kulture, književnosti i umjetnosti, tradicije i kulturne historije Bošnjaka;
2. Podsticanje razvoja nacionalne historiografije radi pripremanja i objavljivanja potpune historije Bošnjaka u Bosni i Hercegovini i domovinskim zemljama;
3. Upoznavanje putem organizovane izdavačke djelatnosti široke javnosti sa svim kulturnim, a posebno znanstvenim, književnim i umjetničkim ostvarenjima Bošnjaka kroz čitavo razdoblje njihovog postojanja;
4. Istraživanje našeg narodnog i književnog jezika što uključuje njegovo standardizovanje, te istraživanje usmene bošnjačke književnosti, etnografije, folkloru i drugih pratećih znanosti;
5. Istraživanje djela bošnjačkih autora iz područja književnosti i filozofije bez obzira na kojem su jeziku pisana, te objavljivanje integralnih tekstova;
6. Predstavljanje Bošnjaka u umjetničkom životu naše zemlje, i van njenih granica, a posebno u domenu pozorišta, muzike, slikarstva, i slično;
7. Osnivanje i vođenje organizacija i ustanova koje su trajna ili privremena potreba bošnjačkog naroda radi proučavanja navedenih oblasti;
8. Organiziranje naučnih skupova, književnih večeri, izložbi iz područja likovne umjetnosti, te pojedinih znanosti;
9. Istraživanja, sakupljanja i objavljivanja podataka i dokumentacije o genocidu u toku 19. i 20. vijeka;
10. Ustanovljenje stalnih nagrada za najbolja naučna, književna i umjetnička djela bošnjačkog kulturnog kruga;
11. Ustanovljenje stalnih nagrada za najbolje radove učenika i studenata;
12. Stipendiranje ili na drugi način pomaganje talentiranih đaka i studenata;
13. Predstavljanje i tumačenje svih postignuća bošnjačke kulture koji čine dio opće kulturne riznice svijeta.

VI AKTIVNOSTI OPĆINSKOG DRUŠTVA

Član 14.

Pored nabrojanih djelatnosti iz člana 13. ovog Statuta Općinsko društvo BZK "Preporod" Srebrenik će svoje aktivnosti usmjeriti naročito na :

1. Predstavljanje uže kulturne baštine i tradicije (Stari grad Srebrenik, kulturno - historijski spomenici i dr.) različitim formama: štampanje listova, časopisa, reprint izdanja, vodiča; organiziranje okruglih stolova, tribina, naučnih skupova i sl.)

2. Promovisanje kulturnog turizma i tradicije Srebrenika i Bosne i Hercegovine.

3. Afirmacija i popularizacija kulture; književnosti i umjetnosti, tradicije i kulturne historije Bošnjaka raznim formama predstavljanja.

Ove aktivnosti društvo može preduzimati i u okviru posebno formiranih odsjeka.

VII ČLANSTVO

Član 15.

Članovi Općinskog društva BZK "Preporod" Srebrenik mogu biti fizička i pravna lica.

Član 16.

Član – pojedinac općinskog društva BZK "Preporod" Srebrenik može postati svaki građanin BiH, kao i strani državljani koji prihvataju programska načela rada BZK "Preporod" u BiH i koji su spremni učestvovati u realizaciji tih načela na bazi dobrovoljnosti u radu.

Potpisivanjem pristupnice smatra se da je osoba prihvatila ciljeve i zadatke i normativne akte Općinskog društva BZK "Preporod" Srebrenik i obavezala se na njihovo poštivanje.

Član 17.

Prava i dužnosti članova Općinskog društva BZK "Preporod" Srebrenik utvrđeni su Statutom Društva, Ustavom i Statutom Bošnjačke zajednice kulture "Preporod" u Bosni i Hercegovini.

Član 18.

Članstvo Općinskog društva BZK "Preporod" Srebrenik čine:

- redovni članovi
- članovi utemeljitelji
- članovi dobrotvori
- počasni članovi

Svaki član Općinskog društva BZK "Preporod" kao i druga fizička lica koja pomažu i podržavaju rad društva mogu donirati novčana sredstva ili pokloniti druga sredstva društvu. Ovakvi članovi-donatori mogu biti i pravna lica.

Počasnim članovima Općinskog društva BZK "Preporod" Srebrenik proglašavaju se pojedina lica, koja imaju naročite zasluge za razvoj općinskog društva. Počasne članove proglašava Skupština društva nakon obrazloženog prijedloga predsjednika društva.

Članovi društva mogu biti i maloljetna lica sa navršениh 14. godina života.

O članovima općinskog društva BZK "Preporod" Srebrenik se vodi evidencija u službenim dokumentima društva.

Članovima društva i svakom drugom fizičkom i pravnom licu koje pomaže i podržava rad društva mogu se dodijeliti priznanja.

Ova priznanja dodjeljuje Skupština, na prijedlog Izvršnog odbora društva, a akt o dodjeli priznanja potpisuje predsjednik društva.

Član 19.

Prava članova Općinskog društva BZK "Preporod" Srebrenik su :

- Da prema vlastitoj inicijativi učestvuju u aktivnostima kojima se izvršavaju programski zadaci društva,
- Da podnose prijedloge za poboljšanje ili unapređenje djelovanja općinskog društva,
- Da pokreću inicijative za rješavanje pojedinih pitanja,
- Da ukazuju na negativne pojave u radu općinskog društva ili u kulturnom životu Bošnjaka uopšte, te predlažu mjere za njihovo otklanjanje i ispravljanje,
- Da u skladu sa propisima općinskog društva BZK "Preporod" Srebrenik biraju organe i da budu birani u organe društva ili u druge posebno osnovane organizacione jedinice općinskog društva,
- Da svaki član općinskog društva BZK "Preporod" Srebrenik potencira skladne međusobne odnose i komunikaciju unutar "društva".

Član 20.

Dužnosti i obaveze članova Općinskog društva BZK "Preporod" Srebrenik su:

- Da svojim radom i ponašanjem čuvaju ugled općinskog društva BZK "Preporod",
- Da uredno plaća članarinu ukoliko takvu odluku donese Skupština društva,
- Da se aktivno zalaže za izvršavanje programskih ciljeva općinskog društva BZK "Preporod", te da pravilnim pristupom potiče i druge da sudjeluju u radu društva.
- Da u skladu sa svojim mogućnostima, prihvati izvršenje posebnih zaduženja, koja mu postavi nadležni organ općinskog društva u skladu sa ovim Statutom i Statutom BZK "Preporod" u BiH,
- Da izbjegava i sprječava unošenje dezinformacija kojima se ruši ugled općinskog društva BZK "Preporod" i izabranih lica.

Član 21.

Član Općinskog društva BZK "Preporod" Srebrenik je odgovoran za:

- nemaran i nesavjestan rad i djelovanje u općinskom društvu,
- unošenje disharmonije kojom se stvaraju nezdravi međuljudski odnosi,
- neistinito i lažno prikazivanje stanja u općinskom društvu,

- odavanje poslovne tajne,
- neurednost u vršenju povjerenih zadataka.

Član 22.

Član udruženja koji grubo krši Statut udruženja, ne izvršava svoje obaveze prema udruženju ili svojim postupcima nanosi štetu udruženju ili narušava njegov ugled može biti isključen iz udruženja. Prije donošenja odluke o isključenju, član udruženja mora biti obaviješten o prijedlogu za isključenje kao i o razlozima zbog kojih se predlaže isključenje.

Članu udruženja ostavlja se rok u trajanju od 15 dana za izjašnjenje o pokrenutom prijedlogu za isključenje iz udruženja.

Odluku o isključenju člana donosi Izvršni odbor.

Član 23.

Članstvo u Općinskom društvu BZK "Preporod" Srebrenik prestaje:

- smrću,
- istupanjem iz članstva, na osnovu pismenog ili usmenog obavještenja,
- postupanjima navedenim u članu 21. ovog Statuta,
- očitim djelovanjem protiv interesa općinskog društva,
- narušavanjem vanstranačkog principa djelovanja,
- vršenjem krivičnih djela.

VIII ZASTUPANJE I PREDSTAVLJANJE

Član 24.

Općinskog društvo BZK "Preporod" Srebrenik zastupa i predstavlja predsjednik Općinskog društva BZK "Preporod" Srebrenik.

Predsjednik općinskog društva BZK "Preporod" Srebrenik imenuju se na mandatni period od **(4)** četiri godine, sa mogućnošću ponovnog izbora.

U slučaju odsutnosti predsjednika zastupanje i predstavljanje vrši zamjenik predsjednika, odnosno lice koje predsjednik odredi.

IX. ORGANI OPĆINSKOG DRUŠTVA

Član 25.

Mandat svih organa utvrđuje se na period od (4) četiri godine sa mogućnosti ponovnog izbora još jedan mandat.

SKUPŠTINA

Član 26.

Skupština je najviši organ općinskog društva BZK "Preporod" Srebrenik. Skupština ima svoj poslovnik o radu.

Član 27.

Skupština vrši svoja prava i dužnosti na osnovi i u okviru Statuta općinskog društva BZK "Preporod" Srebrenik i u skladu sa Statutom Bošnjačke zajednice kulture "Preporod" u Bosni i Hercegovini.

Član 28.

Skupštinu sačinjavaju članovi skupštine iz svih dijelova "Preporoda": predstavnici redovnog članstva, podružnica, kulturnih institucija-članica, ansambala, kulturno-umjetničkih društava, biblioteka, škola, galerija, muzeja, fondacija, izdavačkih kuća, organizacija i udruženja, privatnog sektora i dr.

Broj članova redovne skupštine čini od 31 - 45 zastupnika.

Broj članova skupštine se utvrđuje na osnovu broja prisutnih na redovnoj izbornoj skupštini i taj broj je validan za naredni mandatni period koji traje četiri godine.

Broj članova redovne skupštine je takođe osnov za zakazivanje i rad vanredne skupštine.

Predlagač za organe općinskog društva je kandidaciona komisija koju čine 3 (tri) člana.

Član 29.

Skupština općinskog društva svoje odluke donosi većinom glasova prisutnih zastupnika.

Da bi skupština mogla valjano odlučivati, potrebno je da na sjednici prisustvuje natpolovična većina utvrđenog ukupnog broja zastupnika.

Član 30.

Redovnu kao i vanrednu skupštinu zakazuje predsjednik društva, a u slučaju njegove spriječenosti

zamjenik predsjednika, odnosno predsjednik izvršnog odbora.

Skupština zasijeda u redovnom i vanrednom sazivu.

Član 31.

Izvještajna skupština Općinskog društva BZK "Preporod" Srebrenik održava se najmanje jednom u dvije godine.

Izborna skupština Općinskog društva BZK "Preporod" Srebrenik održava se svake četiri godine.

Vanredna Skupština BZK "Preporod" Srebrenik održava se po potrebi i okolnostima, koje to zahtijevaju, na prijedlog predsjednika općinskog društva (zamjenika predsjednika), izvršnog odbora, nadzornog odbora ili na prijedlog matičnog odbora BZK "Preporod" u Bosni i Hercegovini, ili državnih organa.

Član 32.

Skupština BZK "Preporod" Srebrenik razmatra i odlučuje u redovnom sazivu o svim bitnim pitanjima, a naročito:

1. Donošenje statuta, poslovnika o radu organa društva, pravilnika i drugih normativnih akata;
2. Razmatra sva pitanja bitna za rad općinskog društva BZK "Preporod" Srebrenik;
3. Bira Izvršni odbor, Nadzorni odbor, Sud časti i druge organe u skladu sa ovimstatutom;
4. Bira i razrješava predsjednika i zamjenika predsjednika, a prema potrebi i posebnih odbora ili komisija radi izvršavanja naročito važnih zadataka;
5. Donošenje programa rada društva i usvajanje izvještaja o njihovom izvršenju;
6. Razmatranje izvještaja Izvršnog i Nadzornog odbora i razrješavanje tih organa;
7. Odobravanje godišnjeg proračuna prihoda i rashoda;
8. Razmatra i usvaja Odluke o uspostavljanju odsjeka, ogranaka, poslovnih jedinica i dr. od značaja za rad općinskog društva;
9. Imenovanje organa i voditelja odsjeka, ogranaka i poslovnih jedinica udruženja osnovanih odlukom Skupštine;
10. Odlučivanje o povezivanju općinskog društva BZK "Preporod" Srebrenik " s drugim organizacijama, udruženjima i ustanovama u BiH i izvan Bosne i Hercegovine;
11. Odlučivanje o svim pitanjima koja predlažu članovi skupštine, predsjednik društva i izvršni odbor na sjednicama, ali se mogu izjašnjavati i elektronskim putem ukoliko to zahtijeva hitnost,
12. Odlučivanje o prestanku svog rada;
13. Utvrđivanje članarine;
14. Utvrđivanje prečišćenog teksta Statuta;
15. Razmatranje i usvajanje izvještaja o radu predsjednika društva i drugih organa;
16. Odlučuje o izmjenama i dopunama normativnih akata;
17. Odlučuje o izboru kandidata za zajednice općinskih društava "Preporod" i BZK "Preporod" u BiH.
18. Odlučuje o ustanovljivanju i dodjeli priznanja i nagrada.

Član 33.

Svaka članica društava BZK "Preporod" u Bosni i Hercegovini bira najmanje jednog zastupnika u Skupštinu BZK "Preporod u BiH", o čemu odluku donosi Matični odbor.

Član 34.

Skupština općinskog društva BZK "Preporod" Srebrenik iz reda svojih zastupnika bira radno predsjedništvo, koje čini predsjedavajući skupštine i dva člana predsjedništva, od kojih je jedan član zamjenik predsjedavajućeg skupštine.

Predsjedavajući skupštine je nadležan za :

- rukovođenje radom skupštine,
- predlaže dnevni red sjednice,
- uobličava prijedloge odluka o kojima se glasa,
- utvrđuje i proglašava rezultate glasanja,
- brine o primjeni opštih akata Društva,
- potpisuje odluke i druge akte koje donosi Skupština,
- osigurava u toku provođenja sjednice demokratsku slobodu u raspravljanju i odlučivanju članova Skupštine,
- obavlja i druge poslove za koje se u okviru njegovih prava i obaveza ukaže potreba, a sve u skladu sa Poslovníkom o radu skupštine.

Član 35.

Skupština ima svoj poslovnik o radu, kojim se bliže uređuje njen rad, pravo i dužnosti zastupnika, saradnja Skupštine sa drugim organima, organizacijama i ustanovama; rad Skupštine u izvanrednim okolnostima, izbor organa i članova, njihov opoziv i druga pitanja koja proistječu iz ovog statuta.

IZVRŠNI ODBOR

Član 36.

Izvršni odbor Općinskog društva BZK "Preporod" Srebrenik broji 9 ili 11 članova. Kao izvršno operativni organ skupštine neposredni je realizator programa rada, kojeg donosi Skupština društva.

Član 37.

Zadaci Izvršnog odbora BZK "Preporod" Srebrenik proizilaze iz programa rada društva, odluka i zaključaka skupštine, Zajednice općinskih društava "Preporod" i organa BZK "Preporod" u BiH.

Izvršni odbor naročito:

- Izvršava odluke, zaključke, uputstva i smjernice redovne i vanredne skupštine općinskog društva i organa BZK "Preporod" u BiH;
- Utvrđivanje prijedloga Statuta i drugih akata;
- Predlaganje godišnjeg programa rada, izvještaja o radu i korištenju finansijskih i drugih sredstava, te njihovo podnošenje Skupštini radi usvajanja;
- Bira predsjednika izvršnog odbora i sekretara društva;
- Donosi operativne planove i programe za realizaciju ciljeva i zadataka utvrđenih programom rada društva;
- Podnosi prijedloge o formiranju sekcija, odsjeka, klubova društva, poslovnih jedinica i sl.
- Razmatra prijedloge i zahtjeve organa društva (skupštine, nadzornog odbora, suda časti,

- predsjednika, zamjenika predsjednika) i preuzima mjere koje proizilaze iz njih;
- Postupa u svom radu prema odredbama Pravilnika o radu organa društva.
 - Utvrđuje nacрте akata koje predlaže skupštini i donosi akta u vezi s realizacijom svog programa rada;
 - Uspostavljanje i razvijanje saradnje s drugim organizacijama, udruženjima i ustanovama u sastavu Bošnjačke zajednice kulture “Preporod”, kao svjetske zajednice bošnjačke kulture, u skladu s Ustavom Bošnjačke zajednice kulture “Preporod” i ciljevima ovog statuta;
 - Iznalazi izvore finansiranja, sagledava finansijske potrebe za unapređenje rada društva, stara se o prikupljanju finansijskih i drugih sredstava i upravlja njima, u skladu sa programom rada društva, o čemu podnosi izvještaj skupštini društva;

Prava i obaveze članova izvršnog odbora pored nabrojanog bliže su utvrđena Pravilnikom o radu organa društva;

Član 38.

Članove Izvršnog odbora bira skupština općinskog društva BZK “Preporod”.

Član 39.

Izvršni odbor broji 9 ili 11 članova uključujući predsjednika društva i zamjenika predsjednika.

Skupština bira 5 (pet) ili 7 (sedam) članova izvršnog odbora sa kandidatske liste, koji se biraju tajnim ili javnim glasanjem, s tim što su izabrani oni koji su dobili najveći broj glasova.

Preostala (3) tri člana sa kandidatske liste imenuje predsjednik općinskog društva.

Član 40.

Izvršni odbor Općinskog društva BZK “Preporod” Srebrenik iz reda svojih članova bira predsjednika Izvršnog odbora.

Član 41.

Predsjednik Izvršnog odbora pokreće i podstiče rad odbora, stara se o realizaciji programa rada odbora, saraduje sa predsjednikom društva u pripremi sjednica odbora, priprema i podnosi izvještaje izvršnom odboru i Skupštini o radu odbora.

Član 42.

Izvršni odbor se sastaje po potrebi. Sastanak izvršnog odbora se održava najmanje jednom kvartalno u toku godine.

Član 43.

Ukoliko član izvršnog odbora ne sprovodi odluke odbora, ili ne prisustvuje sjednicama odbora tri puta zaredom neopravdano, predsjednik društva predlaže razrješenje člana izvršnog odbora i imenovanje novog člana izvršnog odbora do kraja tekućeg mandata.

Izbor novog člana izvršnog odbora potvrđuje skupština društva na narednom vanrednom ili redovnom zasijedanju.

Član 44.

Izvršni odbor donosi odluke većinom prisutnih na sjednici odbora, ukoliko je obezbijeđen kvorum (natpolovična većina) članova za rad odbora. Ukoliko se ne može obezbijediti kvorum za sjednicu odbora tri puta zaredom, predsjednik društva zakazuje vanrednu skupštinu društva na kojoj se imenuje novi izvršni odbor.

NADZORNI ODBOR

Član 45.

Nadzorni odbor općinskog društva BZK "Preporod" Srebrenik sastoji se od tri (3) člana. Predsjednika i članove Nadzornog odbora bira skupština na mandatni period od 4 (četiri) godine.

Nadzorni odbor vrši nadzor rada društva, a naročito :

- Vršiti kontrolu finansijskog poslovanja društva i o tome izvještava Skupštinu,
- Predlaže mjere poboljšanja poslovanja društva ,
- Prati primjenu odredaba ovog Statuta i izvršavanje odluka Skupštine, Izvršnog odbora i drugih organa društva.

SUD ČASTI

Član 46.

Sud časti Općinskog društva BZK "Preporod" Srebrenik sačinjavaju (3) tri člana koje bira skupština društva.

Sud časti rješava statusna i druga pitanja na osnovu kršenja odredbi Statuta koje se odnose na članstvo, organe i lica društva.

Razmatra i rješava sve nesporazume koji mogu nastati u komunikacija unutar organa društva ili između lica i organa društva.

Sud časti može na osnovu prijedloga izvršnog odbora ili predsjednika društva donijeti i odluku o prestanku članstva u općinskom društvu.

Sud časti ima svog predsjednika. Mandat članovima Suda časti traje 4 (četiri) godine i može biti ponovljen još jednom.

X UNUTRAŠNJA ORGANIZACIJA OPĆINSKOG DRUŠTVA

Član 47.

Općinsko društvo BZK "Preporod "Srebrenik u skladu sa svojim potrebama i finansijskim mogućnostima rad organizuje po dijelovima, koji mogu činiti:

1. Ured

Poslovi ureda se organizuju za administrativno - tehničke i računovodstvene potrebe općinskog društva. Ured mogu činiti sljedeća stručna lica:

- Sekretar društva
- Računovodstveni službenik
- Administrativni tehničar

2.Odsjeci

Odsjeci se organizuju za provođenje aktivnosti društva utvrđenih statutom i programom rada društva. Broj odsjeka se utvrđuje pravilnikom o radu organa društva i može se povećavati, odnosno smanjivati.

- Odsjek za kulturnu djelatnost (sekcije, klubovi i sl.)
- Odsjek za izdavačku djelatnost (nova izdanja i reprint izdanja, časopisi, listovi i sl.)
- Odsjek za promociju, afirmaciju i popularizacije kulture, književnosti i umjetnosti, tradicije, kulturnog turizma, kulturne historije Bošnjaka, uže kulturne baštine i dr.
- Odsjek za privrednu djelatnost

Svaki odsjek može imati svog voditelja kojeg predlaže predsjednik društva, a imenovanje potvrđuje skupština društva.

Unutrašnja organizacija organa društva se reguliše posebnim pravilnikom, koji razmatra i usvaja skupština društva.

Ukoliko općinsko društvo svojom djelatnošću ostvaruje prihode kojima se mogu planirati novčane naknade za rad organa i lica, onda se ta pitanja regulišu posebnim pravilnikom o naknadama za rad organa i lica općinskog društva.

Predsjednik

Član 48.

Predsjednik Općinskog društva BZK "Preporod "Srebrenik predstavlja i zastupa društvo; sudjeluje u radu Izvršnog odbora, te predlaže donošenje odluka za unapređenje rada i uklanjanje utvrđenih nedostataka.

Predsjednik Općinskog društva je odgovoran za provođenje okvirnog programa rada društva, koji usvaja skupština društva.

Član 49.

Predsjednik Općinskog društva BZK "Preporod "Srebrenik potpisuje sve akte i druge pisane dokumente koji se odnose na rad i poslovanje društva u skladu sa važećim propisima.

Predsjednik društva može posebnim aktom ovlastiti lice za potpisivanje dokumenata, kojima se definišu isplate naknada izvršiocima usluga za potrebe rada društva (ugovori i sl) u slučajevima njegove spriječenosti, kao i u drugim slučajevima kada je zakonom regulisan postupak isplate naknada ovlaštenim licima.

Član 50.

Predsjednik Općinskog društva BZK "Preporod "Srebrenik uspostavlja i razvija saradnju s drugim organizacijama, udruženjima i ustanovama, u smislu ovog statuta, u skladu s Ustavom, Statutom i drugim dokumentima Bošnjačke zajednice kulture "Preporod" u Bosni i Hercegovini.

Član 51.

Predsjednika Općinskog društva BZK "Preporod "Srebrenik bira skupština društva i to na period od 4 (četiri) godine.

Član 52.

Ako se za izbor predsjednika društva prijave dva ili više kandidata njihov redoslijed se utvrđuje po abecednom redu i biraju se tajnim glasanjem.

Član 53.

Predsjednik Općinskog društva BZK "Preporod "Srebrenik može biti najviše dva puta izabran na taj položaj.

Član 54.

Predsjednik općinskog društva ima pravo na mjesečnu novčanu naknadu za svoj rad, ukoliko za to postoje obezbijedena finansijska sredstva.

Odluku o vrsti naknade i visini iznosa donosi Izvršni odbor društva.

Zamjenik predsjednika

Član 55.

Zamjenik predsjednika Općinskog društva BZK "Preporod "Srebrenik zamjenjuje predsjednika sa svim njegovim pravima i obavezama u slučajevima njegove odsutnosti ili spriječenosti ili u međusobnom dogovoru.

Član 56.

Zamjenika predsjednika Općinskog društva BZK "Preporod "Srebrenik bira Skupština na period od četiri godine.

Član 57.

Zamjenik predsjednika Općinskog društva BZK "Preporod "Srebrenik može biti izabran na taj položaj najviše dva puta.

Sekretar/Tajnik društva

Član 58.

Općinsko društvo može imati sekretara. To je lice koje može profesionalno obavljati poslove sa punim ili polovičnim radnim vremenom, ukoliko postoje obezbijedena finansijska sredstva za te namjene.

Sekretar rukovodi svim poslovima ureda. Priprema materijale za sjednice organa društva i obezbjeđuje normalno administrativno - finansijsko poslovanje društva.

Sekretara imenuje izvršni odbor društva na period od 4 (četiri) godine i imenovanje mu se može ponoviti još jednom.

Po svom položaju sekretar je punopravan član izvršnog odbora i obavezno prisustvuje sjednicama

organa društva.

Sekretar društva može prisustvovati sjednicama organa svih organizacija, udruženja i ustanova udruženih u Zajednicu BZK "Preporod" u BiH.

XI STICANJE I RASPOLAGANJE IMOVINOM

Član 59.

Općinskog društvo BZK "Preporod "Srebrenik može sticati imovinu u skladu sa zakonom, a postojećom imovinom društva upravlja i raspolaze izvršni odbor društva.

O stanju imovine društva brine predsjednik društva i o tome izvještava skupštinu na njenom zasijedanju.

U slučaju prestanka rada društva odluku o raspolaganju preostalim imovinom donosi skupština društva na prijedlog izvršnog odbora.

XII NAČIN DONOŠENJA FINANSIJSKOG IZVJEŠTAJA I IZVJEŠTAJA O RADU

Član 60.

Izvještaj o finansijskom stanju društva i izvještaj o radu podnosi predsjednik društva na izvještajnoj i redovnoj skupštini društva, a po potrebi i na vanrednoj skupštini.

Izvještaje o radu ostalih organa podnose predsjednici tih organa na skupštini društva.

Finansijski izvještaj i izvještaj o radu usvaja skupština većinom glasova prisutnih članova skupštine.

XIII JAVNOST RADA

Član 61.

Rad Općinskog društva BZK "Preporod "Srebrenik je javan, i sve njegove odluke dostupne su članovima društva, koji se o njima obavještavaju preko službenih i drugih glasila općinskog društva, kao i preko drugih sredstava javnog obavještavanja.

Član 62.

Za redovno obavještavanje članstva o aktivnostima društva zadužen je sekretar Općinskog društva BZK "Preporod" Srebrenik ili drugo lice koje ovlasti izvršni odbor.

XIV POVEZIVANJE

Član 63.

Općinsko društvo BZK "Preporod "Srebrenik" predstavlja organizacijski dio Bošnjačke zajednice

kulture "Preporod" u BiH, preko koje se može povezivati i s drugim bošnjačkim i nebošnjačkim organizacijama, udruženjima i ustanovama u zemlji i inostranstvu, o čemu odluku donosi Skupština društva.

XV FINANSIRANJE

Član 64.

Općinsko društvo BZK "Preporod "Srebrenik" pribavlja finansijska i druga sredstva za svoj rad iz sljedećih izvora:

1. Članarine ;
2. Darova u različitim oblicima (financijski prilozima, pokretne i nepokretne vrijednosti, itd.) pojedinaca, organizacija, udruženja i ustanova;
3. Od dobiti preduzeća čiji je osnivač općinsko društvo BZK "Preporod" ;
4. Prihodi od izdavačke djelatnosti, određene privredne djelatnosti i drugih djelatnosti koje se obavljaju u skladu s ciljevima rada društva;
5. Sredstva po osnovu javnih poziva domaćih i međunarodnih institucija za finansiranje projekata kulture ;
6. Grant sredstava općinskih, kantonalnih, federalnih i državnih organa ukoliko su obezbijedena odlukama tih organa.
7. Drugih izvora, koji su u skladu s načelima bošnjačke kulture i zakonima Bosne i Hercegovine.

XVI PRESTANAK RADA

Član 65.

Općinsko društvo BZK "Preporod "Srebrenik" prestaje sa radom u slučajevima predviđenim zakonom i odlukama Skupštine.

XVII PRIJELAZNE I ZAVRŠNE ODREDBE

Član 66.

Izmjene i dopune ovog statuta vrše se na način predviđen za njegovo donošenje

Član 67.

Tumačenje ovog statuta daju Skupština i Izvršni odbor Općinskog društva.

Član 68.

Za pitanja koja nisu obuhvaćena ovim Statutom, a tiču se rada općinskog društva primjenjuje se odredbe važećeg Statuta BZK "Preporod" u BiH i zakona BiH.

Član 69.

Donošenjem ovog Statuta, prestaje da važi prethodni Statut Općinskog društva BZK "Preporod " Srebrenik, te svi drugi akti koji su u suprotnosti s ovim statutom.

Član 70.

Ovaj Statut stupa na snagu danom njegovog donošenja i usvajanja.

Skupština društva

Broj: 01- /18

Datum: 21.11.2018.

Predsjedavajući skupštine

MP